

列女傳

列

女

傳

首卷



八旗通志初集卷之二百三十九

列女傳

王化莫先於閨門。故關雎鵲巢以爲風始。風由近以及遠。詩小序釋二南。謂王化自北而南。八

旗則

國朝之二南也。江漢汝墳。固莫能或之先已。每稽歲終彙奏婦女節烈。則

旌門之典。莫盛於八旗。而從殉者尤多。

聖祖仁皇帝好生之德。始詔停殉夫者。



旌典。而八旗以殉夫報部者。比比而是。則聖化漸摩已深。節烈成風。不以

恩例之得失移其志也。何其盛哉。雍正元年。

恩詔言旌表節義。乃彰善大典。每見直省地方有力之家。尚能上達。而鄉村貧窶之人。則多湮沒無聞。深可憫惻。著督撫學臣及有司。遍加採訪。務使苦寒守節之家。同霑恩澤。至節婦年逾四十而身故。計其守節已歷十五載以上者。亦應酌量旌獎。殊恩異數。古未有也。今廣搜八旗節烈婦女。備著於志。

載稽漢劉向氏首傳列女。凡賢淑明慧者皆得與

馬。不止於節烈。顧婦行不踰閭。非節烈無由自見。今八旗節烈婦女具於

實錄史書。及部冊所存。八旗所保送者。備載不遺。而以宗室王公妃夫人冠於篇首。其有賢淑之德。或

誕生

聖后。或保育

聖主。得受

殊恩。哀榮特異者。亦附見王公妃夫人之後。合為列

女傳。庶八旗閨門之化之盛。得備攷焉。

列女傳一

宗室王公節烈妻女。福金夫人格格等。宗室節烈妻女。覺羅節婦烈婦等。誕生。

聖后保育

聖躬諸夫人

貝勒莽古爾泰。大福金。天聰六年十二月乙丑。

貝勒薨時

太宗文皇帝與諸貝勒及眾福金等往哭之。夜二鼓。大

福金以死殉。請曰。相隨貝勒已久。豈可獨存。

太宗諭曰。爾子尚幼。既失父。又失母子。將誰撫。勸止之。

大福金對曰。吾雖在。豈別有撫養之法。

上為叔父。貝勒為伯父。自能鞠育。言畢。不剪髮。不脫珥。

固欲殉。

太宗仍力勸之。令東果公主及諸貝勒為福金剪髮。脫

珥。令撫遺孤。乃止。

烏喇福金。貝勒莽古爾泰次福金也。貝勒薨時。

請從殉。

太宗諭曰。兄與爾初不甚睦。不當殉。福金對曰。始固和

好。因失禮於

先帝方見踈。今安可背貝勒而獨存。言畢。遂往別室自盡。又侍妾一人亦從死焉。

納蘭氏。貝勒岳託福金也。崇德四年。岳託薨。福金以死殉焉。

舒呼禮。姓黃氏。本高麗人。和碩肅親王次妃。順治五年。肅親王薨。遂自盡以殉。奉

旨。褒美。給勅諭。祭葬如典禮。今肅親王曾孫。有奉恩將軍。任一等待衛名圖納者。即黃氏所生之後也。輔政德豫親王多鐸次福金。順治六年三月丁

丑。多鐸薨。次福金請身殉。睿王再三慰解。請益力。遂許之。

珍木積。和碩巽親王元妃。係纛章京阿爾津之女。年十二歲。選爲王妃。至十六歲。王薨。妃從殉。

時順治十年五月十二日也。

賽敏珠。和碩巽親王側室。係擺牙喇甲喇章京布達里之女。十五歲。選入王府。年二十。王薨。遂從殉。順治十年五月十二日奉

旨。給紙三千張。羊二隻。酒三瓶。內院撰給祭文。遣官致

祭

三等總兵官佟養性妻。係鎮國公席特庫之姊。二十九歲守節。至五十一歲。順治十三年二月。奉

旨旌表。給獎諭勅命一道。銀三十五兩。緞二疋。

巴蘇太。輔國公世布石倫妻。係勿魯杜朝兒楂兒之女也。十四歲適公。二十二歲公卒。遂從殉。奉

旨諭祭。文曰。溯王化之本原。閨門稱首。肅人倫之綱紀。

節烈居先。用昭風勵之權。可靳表章之實。爾巴蘇太。乃輔國公世布石倫之妻。婉孌季女。閨闋名媛。歸我宗臣。聿彰懿德。屬所天之就殞。遂視死以如歸。畢命黃泉。覺徽音之未遠。垂名彤史。尚生氣之凜如。芝蘭之氣常存。初無愁於風雨。松栢之姿不改。復奚憾於冰霜。特沛有赫之王綸。永勵守貞之士女。

烏努古。和碩鄭親王濟爾哈朗側室。係達虎之女。十四歲入王府。至二十歲。王薨。遂從殉。舒紀。和碩鄭親王濟爾哈朗側室。係帖拉尼之

女二十三歲入王府。四十一歲。王薨。遂從殉。  
蘇邁。和碩鄭親王濟爾哈朗側室。係南大海之  
女。十八歲入王府。二十三歲。王薨。遂從殉。  
德音哲。和碩鄭親王濟爾哈朗側室。係德克蘇  
尼之女。二十歲入王府。二十二歲。王薨。遂從殉。  
穆克金。和碩鄭親王濟爾哈朗側室。係穆都之  
女。二十歲入王府。二十二歲。王薨。遂從殉。  
納蘭氏。和碩敬謹莊親王尼堪側室。二十四歲  
入王府。王出征湖南。戰歿。柩至京。納蘭氏從殉。

時年二十五歲。

舒穆魯氏。和碩敬謹莊親王尼堪側室。係胡鈕  
之女。十七歲入王府。王戰歿湖南。柩至京。與納  
蘭氏同殉。時年十七歲。

自巴蘇太至舒穆魯氏。順治十三年三月奉  
旨。給紙各三千張。羊各二隻。酒各三瓶。內院撰給祭文。  
遣官讀文。奠酒致祭。

碩尼。輔國公品級查喀納側室。十八歲入府。三  
十四歲。公卒。遂殉節。順治十八年二月奉

旨旌表

宗室輔國將軍塞克圖之母二十八歲守節至五十五歲順治十七年奉

旨旌表

布顏圖妻係鎮國將軍聶克塞之妹二十七歲守節至五十二歲順治十七年三月奉

旨旌表

博爾濟錦氏鎮國公福勒赫之妻係桑噶爾濟之女年三十歲公卒氏從殉順治十八年奉

旨諭祭文曰帝澤首重乎本支王化允隆夫貞烈生脩

蘋藻歿錫苾芬惟鎮國公福勒赫妻博爾濟錦氏式循內則聞範孔昭當公逝時爾捐軀從一秉志自殉追遡貞良深懷憫惻爰頒祭典以誌旌褒聿昭不朽之榮用表靡他之節爾靈有知尚其歆享

鎮國將軍品級馬喀納之母二十八歲守節至五十歲康熙二十一年正月二十六日奉

旨旌表給銀三十五兩緞二疋內閣撰寫勅書一道

趙格正白旗輔國將軍散秩大臣都爾巴之妻



康熙二十五年五月初二日。都爾巴病故。即於  
本日殉節。本年十二月初一日奉  
旨給羊一隻。酒二罈。紙六千張。遣官致祭。

納蘭氏。鑲藍旗和碩鄭親王。愨厚世子富爾敦  
福金。十三歲守節。至五十歲。康熙二十七年十  
二月十六日奉

旨旌表。給獎諭勅書。銀九十兩。緞十四疋。

博爾濟錦氏。正白旗宗室塞圖佐領下輔國將  
軍伯奇之妻。二十八歲守節。至五十歲。康熙三

十二年十二月十八日奉

旨旌表。給獎諭勅書一道。銀五十五兩。緞六疋。

傅察氏。怡賢親王胤祥第二子追封貝勒弘曠  
之妻。雍正六年弘曠病故。而傅察氏尚未婚娶。

聞訃。即慟哭。截髮。至王府懇求持服守制。王以

其未成婚。不許。傅察氏於門外跪哭。以夜繼日。

王終不許。乃歸至母家。持服守節。矢志靡他。時

傅察氏方十七歲也。及王薨。氏又踵門哀請。王

府人員奏

聞。

世宗憲皇帝降旨褒美。准給孝服。命王妃淑為子婦。弘  
燾身後典禮視貝勒。以親兄弟之子一人為嗣。  
襲封。令傅察氏撫之。以旌節孝焉。

旨旌表。  
吉爾門氏。正白旗宗室普遂。佐領下。原任奉國  
將軍永德之妻。年二十三歲。夫故守節。雍正十  
一年奉

旨旌表。  
民覺羅氏。正藍旗額圖渾。佐領下。原任奉國將  
軍鄂明之妻。年二十三歲。夫故守節。雍正十二  
年奉

旨旌表。  
穆佳氏。正黃旗滿洲尚陽寶。佐領下。原任輔國  
將軍富良之妻。年二十七歲。夫故守節。雍正十  
三年奉

旨旌表。  
民覺羅氏。鑲藍旗滿洲花色。佐領下。原任奉恩

將軍鍾奇之妻。年二十六歲。夫故守節。雍正十三年奉

旨旌表。

兆氏。正藍旗滿洲額圖渾管領下奉恩將軍岳努之妻。年二十一歲。夫故守節。雍正十三年奉

旨旌表。

以上係宗室王公節烈福金夫人格格等

哲賴。正黃旗夏爾計格之妻。係宗室白臨哈思虎之女。二十七歲守節。至五十一歲。順治十年

旨旌表。

五月十二日奉

鑲紅旗漢軍湖北巡撫柯永昇之妻。係宗室輔國公長壽之女。康熙二十七年。因武昌兵變。永昇於任所殉難。氏時年二十二歲。扶柩回京。即於宗人府具呈。願撫孤守節。宗人府具奏。奉旨依議。氏自二十二歲守節。至六十七歲。宗黨咸稱其賢。氏係命婦。例不請

旌。

高氏正藍旗覺羅祐庇佐領下一等侍衛宗室  
勒克德之妻二十五歲夫故守節至五十歲康  
熙三十二年十二月奉

旨旌表給獎諭勅書一道銀三十五兩緞二疋

閒散宗室海全之妻副都統阿濟里之女也康  
熙四十七年三月十七日海全病故時婦年二  
十六歲公姑以其無嗣送歸母家婦遂絕粒以  
簪刺傷右目誓守夫墓奉養公姑公姑聞之迎  
歸具呈府人府轉奏奉

旨聽其守節以成厥志年至三十六歲病卒

董佳氏正藍旗閒散宗室興昌之妻係正白旗  
原任吏部尚書鄂爾多之女康熙四十八年二  
月興昌病故氏年二十四歲康熙五十年十二  
月該衙門引定例察孀婦年幼與無親生子者  
以居守甚難著令回親眷等因議奏奉

旨依議欽此孀婦聞之持刃自刎家人救之後又自刎  
昏迷良久乃謂人曰吾雖無親生子欲養吾夫  
之四弟以守墓度日等語將此緣由呈明送宗

人府王等遣員驗視。以所傷甚重。復議得孀婦  
自刎。乃其心之誠。於居守。即著令留守等。因具  
奏奉

旨。著令留伊守夫之墓。

以上係宗室節烈妻女

滿代。鑲黃旗覺羅噶布喇之妻。二十九歲守節。  
至五十歲。順治十七年三月奉

旨旌表。

隋赫晉正紅旗拜他喇布勒哈番覺羅伊薩哈

妻。順治五年十一月二十七日。伊薩哈病故。隋  
赫晉年十九歲。無子嗣。辛苦守節。至五十歲。克  
盡婦道。勤謹貞靜。康熙十八年奉

旨旌表。

常姐。正紅旗覺羅塞特佐領下。八品官覺羅握  
信妻。康熙二十年五月十二日。夫故。即於是日  
殉節。二十一年正月二十六日奉

旨。給與紙五百張。羊一隻。酒一罇。內閣撰祭文。遣官致  
祭。

旨旌表

戴佳氏。鑲白旗覺羅海蘭佐領下。原任二等護衛。覺羅穆格善之妻。順治八年正月。穆格善病故。氏年二十歲守節。至五十歲奉

旨旌表

瓜爾佳氏。正黃旗覺羅進堅佐領下。原任六品官。覺羅劉禮霸之妻。劉禮霸於康熙十九年病故。氏年二十四歲守節。至五十歲。四十五年奉

汪氏。正黃旗滿洲覺羅董國禮佐領下。阿達哈

哈番詹事府少詹事覺羅僧叅之妻。年二十二歲。夫故守節。撫前妻之子如已出。以勤儉治家。食貧作苦。晏如也。性貞靜。教諸子極嚴。俱讀書登科第。長子逢泰。康熙庚辰科進士。經筵講官。翰林院侍讀學士。次子元旦。丙子科舉人。三子滿保。甲戌科進士。浙閩總督加兵部尚書。康熙五十九年請

旌。六十年六月。壽終於滿保署中。九月。

聖祖仁皇帝念滿保平定臺灣之功。由賢母教誨之力。

御書慈壺義方匾額一。嚴母教以宜家。毓成偉器。勵臣忠而訓子。懋建殊勳。對聯一副。以賜之。雍正元年。追封一品夫人。

那氏。正紅旗滿洲覺羅永普佐領下。員外郎覺羅都爾福之妻。年二十八歲。夫故守節。雍正十年奉

旨旌表

趙佳氏。鑲藍旗滿洲覺羅尼雅哈理佐領下。內閣侍讀覺羅富昌之妻。年二十五歲。夫故守節。

雍正十二年奉

旨旌表

瓜爾佳氏。正藍旗滿洲覺羅札布善佐領下。三等侍衛覺羅常舒寶之妻。年二十六歲。夫故守節。雍正十三年奉

旨旌表

嘎爾沁氏。正藍旗滿洲覺羅扎布善佐領下。三等阿達哈哈番覺羅寶帶之妻。年二十四歲。夫故守節。雍正十三年奉

旨旌表

以上係覺羅節婦烈婦

一品夫人覺羅氏係誥贈一等公佟圖賴妻

孝康章皇后母也康熙二十一年奉

旨遣官致祭四次照一等公例給與葬價立碑其碑文

曰朕惟帝王之道孝施於政而教成仁篤於親而民

法此天下之大經人倫之至則也是以書言肇修詩

稱罔極蓋恩由敦本而隆禮必緣情而起愛慕時勤

於懿訓褒崇宜及於茂親存則分介祉之榮歿則頌

厚終之典彛章具備國體攸存惟誥贈一等公佟圖

賴妻誥封一等公妻一品夫人覺羅氏乃

孝康慈和莊懿恭惠崇天育聖章皇后之母毓秀名門

作儷巨室女德爲人中之瑞壺修啓天降之祥惟善

積於厥身乃福凝於懿戚誕生

皇妣表範宮闈播千禩之徽音鍾於

聖母綿萬年之景祚昇於朕躬憶從蚤歲遽隔

慈顏每念恩勤常餘哀慕矐令儀猶存於戚畹緬音容

如覲於璇幃方期彌享大年豈謂淹歸厚壤良深軫



悼爰示褒揚。特詔所司。優以異數。土田舊錫。賙賻有加。賜葬如一等公禮。嗚呼。布在方策。事莫大於親親。勒之貞珉。光有垂於世世。聿賁龍章之重。揭於馬鬣之封。昭茲來許。其永無窮。

一品夫人赫攝禮氏。領侍衛內大臣一等公國舅佟國維妻。

孝懿仁皇后之母也。康熙五十九年病故。奉

旨諭祭。文曰。國家優崇勲舊。逮及閨闈。苟內則之用修。宜特恩之下賁。爾赫攝禮氏。含英華胄。作配名門。淑

慎性成。早樹珩璜之範。柔嘉夙著。茂膺禴翟之榮。誕育孝懿。皇后備德璇闈。流徽椒掖。溯鍾祥所自始。實賢母之篤生。故每被以殊恩。頌之異數。比當屬疾。軫念殊深。爰遣良醫。補以藥石。頻命中使。問其起居。迨奄逝之遽聞。用悼傷之滋甚。典隆賜奠。禮備飭終。嗚呼。託肺腑於天家。累世之寵光既久。昇絳綸於幽壤。中闈之褒錫維新。靈如有知。尚其歆享。雍正元年。復

奉

旨諭祭。其文云。

皇帝諭祭外祖公。佟國維之妻一品夫人。外祖母赫攝  
禮氏之靈曰。位重中朝。勲舊之恩。施既渥。德嘉內助。  
閨闈之褒。錫宜優。慨歲月之潛移。芳規猶昨。賁絲綸  
於勿替。曠典維新。爾赫攝禮氏。秉禮無愆。閑家有則。  
被殊榮於綸翟。奕葉鍾祥。著令範於珩璜。塗椒衍慶。  
篤生

孝懿皇后。坤儀正位。壺教揚徽。念盛德之難忘。實凝庥  
之有自。追維  
聖祖。實篤懿親。上體

慈衷。爰頌新綉。餽香酌酒。用光盛事於九原。珉石鐫文。  
永樹芳聲於百世。嗚呼懷舊勲於戚里。邱原之草木。  
增輝錫新命於皇家。闕闕之簪纓。聿茂爾靈。不昧庶  
其歆承。

一等公衛武之祖母傅察氏。係

仁壽皇太后之曾祖母也。雍正元年。奉  
旨追贈一等公夫人。遣官致祭。其文云。

皇帝諭祭外祖衛武之祖母。追封一等公夫人傅察氏  
之靈曰。誼篤展親。溥外家之恩澤。禮崇追遠。彰內助

之勤勞累傳而閭範長存三錫之王綸式煥爾傳察  
氏乃

仁壽皇太后之曾祖母誕生茂族作配勲臣贊韜畧之  
機芳型早著稟幽閒之性令德攸彰積善門高光啓  
聖慈於今日貽庥緒遠尚傳懿訓於當年仰承

純孝之思聿遡鍾祥之自加封一品被綸翟之采章錫  
命九原耀龍鸞於誥紙嗚呼國恩攸重賁象服以增  
榮家慶方隆衍簪纓而勿替淑靈不泯尚克來歆其  
追封典禮仍立碑墓道云

一等公衛武之母瓜爾佳氏係

仁壽皇太后之祖母也雍正元年奉

旨追贈一等公夫人遣官致祭其文云

皇帝諭祭外祖衛武之母追封一等公夫人瓜爾佳氏  
之靈曰禮重媯親寵錫不遺夫母教德資內助贊襄  
端藉於壺儀矧令德之丕昭宜殊榮之特賁爾瓜爾  
佳氏乃

仁壽皇太后之祖母性惟恭順度表柔嘉傳禮法於珩  
璜克彰遺範播仁慈於家室爰樹芳規善備厥躬遺

徽傳於蘭閣。澤延奕世。積慶集於椒宮。緬懷令德之難忘。追念發祥之有本。爰稽彞憲。特沛隆施。綸綍誕膺。用展尊榮之典。苾芬式薦。聿昭優渥之恩。嗚呼。著淑慎於當年。永作閨闈之矩矱。垂儀型於今日。長存圖史之箴規。靈其有知。尚克歆享。其追封典禮。仍立碑墓道云。

一等公衛武之妻塞和里氏。

仁壽皇太后之母也。雍正元年奉

旨。追贈一等公夫人。遣官致祭。其文云。

皇帝諭祭外祖母追封一等公夫人塞和里氏之靈曰。湖外家之世澤。衍慶方長。美中壺之徽音。鍾祥有自。想儀型之如在。宜寵命之聿新。爾塞和里氏。系出華宗。名高德配。庭闈克孝。惟修愉婉之容。箴史優嫺。不怠敬恭之節。善作治家之政。諧睦親疎。克襄報國之猷。勤勞夙夜。誕我仁壽皇太后。周南起化。式傳溫惠之風。渭涘凝麻。推本賢明之訓。恩加象服。配崇號於上公。禮奠椒觴。賁殊榮於懿戚。於戲。流芳徽於奕葉。簡策增輝。追淑範於

九原松楸生色。靈其不昧。尚克歆承。仍立碑墓道。紀追封典禮焉。

多羅格格。內大臣提督九門步軍統領追封一等公費揚古妻。

孝敬憲皇后之母也。雍正元年奉

旨追贈一等公夫人。仍遣官致祭。其文云。

皇帝諭祭內大臣提督九門步軍統領追封一等公費揚古妻多羅格格之靈曰。因親寵錫誼莫重於宗支。自近推恩情尤殷於外族。况柔嘉之令德炳於生前。

宜綸縟之榮施。隆於歿後。爾多羅格格毓秀銀潢。于歸華胄。從容中禮。響應節之璜琚。婉婉同心。奏諧聲之琴瑟。誕生淑德。位正坤元。實藉芳型。教端內則。茲特崇以典禮。培爾佳城。用揚壺德之徽。聿展中心之貺。嗚呼。懿範徒存。悼禴禘之永隔。松楸式賁。應寵命以常新。爾靈有知。尚其來格。其追封典禮。仍立碑墓道云。

奉聖夫人朴氏。

世祖章皇帝乳母也。夫哈喇。授阿達哈哈番。世職康熙

十六年夫人病故

聖祖仁皇帝諭禮部曰

世祖章皇帝乳母朴氏保育

先皇克昭敬慎朕躬幼時殫心調護夙夜慇懃撫視周  
詳情實等於顧復提携備至時罔怠於寒暄襁抱曲  
體乎性情勤劬彌切於啼笑恭謹抒匪懈之忱淑惠  
盡慈愛之義每懷疇昔時厯於衷封典宜加用彰隆  
眷今封爲奉聖夫人頂帶服色照公夫人品級爾部  
即遵諭行隨遣官致祭五次立碑墓道文曰朕惟天

亶聖哲則必有賢淑之媪爲維持於宮闈誕育之初  
以培至德而凝介祉故生敦勤恪之誠斯歿膺優渥  
之澤所以酌勞彰善著爲國經爾奉聖夫人朴氏乃  
皇考世祖章皇帝之乳媪也越在我

皇考幼冲岐嶷之年爾以溫惠之資受保抱之任克敬  
克慎惟愛惟和殫心靡怠於暑寒効力聿虔於昕夕  
用能翼護

聖躬流譽禁掖暨乎朕之初載爾則勤劬益摯肫懇彌  
殷勵鞠養以無方勗始終而如一眷言姆範良篤厥

勞既克受。天孚佑享。有遐齡。迺奄然物化。朕實心盡。爰詔所司。錫之異數。特賜

孝陵近地。葬如公夫人禮。嗚呼。依

陵園而營窀穸。寵光長賁於重泉。邁侯伯而備儀文典。制式隆乎常憲。鐫之貞碣。永旌爾賢。旋奉

特恩。建祠墓道。春秋致祭。雍正二年閏四月。復蒙

特恩。遣官致祭。

保聖夫人瓜爾佳氏

聖祖仁皇帝之乳媪也。康熙三十八年病故。贈保聖夫

人。遣官

諭祭四次。其初次祭文曰。自古帝王誕生之始。必資阿

保。鞠養之人。用以調護晨昏。維持身體。惟生前之恪

共。既懋斯歿後之恩。卹宜隆。爾保聖夫人瓜爾佳氏

賦性安和。居懷謹密。曩朕冲幼之歲。方資乳抱之勤。

太皇太后鑒爾慈良。命之保育。爾竭心盡力。克慎克勤。

乃積年祇事於

慈闈。畢世忘綜其家政。持身愈謹。口不道夫前勞。歛跡愈深。外不聞其名氏。爾爲阿母。堪作表儀。方謂克享

遐齡永綏多福。豈期大耋未屆。一病沉綿。撫視再三。臨喪哀悼。爰追錫以嘉號。俾修祀於初筵。嗚呼錫命。六珈被寵。榮而勿替。升香五鼎。頌綸綍以加崇。靈其有知。庶幾來享。雍正元年復奉。

旨諭祭文曰。誼任維持。左右實資。夫護視職司。阿保宮闈。必賴其追隨。惟生前克殫乎朏誠。斯歿後宜加夫褒恤。爾保聖夫人瓜爾佳氏。安和成性。謹恪爲懷。奉

我

皇考聖祖仁皇帝翼翼小心。保抱無愆。夙夜循循。供事

經營不及私家。殷勤并逮於朕躬。勞勩彌思。夫往日爰稽彛典。特沛寵榮。嗚呼酒薦芳筵。渥澤重沾於幽壤。恩流後裔。隆施丕著乎新綸。靈其有知。來歆來格。

佐聖夫人葉黑勒氏。夫邁堪。姓瓜爾佳。滿洲正藍旗人。以二等阿達哈哈。畚任散秩大臣。崇德三年氏選爲

世祖章皇帝乳媪。康熙六十年。追封佐聖夫人。遣官諭祭。文曰。自古帝王誕生。貞符協應。而其簡畀。阿保調護。聖躬於以順。陰陽之宜。視寢膳之節。厥任亦綦重。



焉。惟生前祇承於宮壺。實著成勞。斯沒後屢易夫星。霜爰加殊典。爾佐聖夫人葉黑勒氏。稟性慈和。存心謹密。昔

皇考世祖章皇帝甫在幼冲之歲。常資乳抱之功。夙夜是勤。寒暑彌慎。身依殿廡。置家事於罔聞。動合禮儀。考女德而無愧。自經徂謝。久更歲年。寵命未頒。追封有待。昨朕躬謁

陵園。爾孫籲請。追維曩昔。彌切軫懷。特沛殊施。錫之嘉號。將垂光於琬琰。俾修祀於几筵。嗚呼。牲醴具陳。覺懿徽之未遠。絲綸用賁。庶幽壤之增華。惟爾有知其克歆享。

佑聖夫人李嘉氏亦係

世祖章皇帝乳媪康熙六十年追封佑聖夫人遣官

諭祭文曰。自古神聖誕生。必資保育。故禮經所載。必得寬裕慈惠。溫良恭敬之人。以克其選。若夫克勤鞠養。罔間晨昏。雖寵命未錫於生前。而追封必加夫身後。蓋念舊之恩。久而弗替也。爾佑聖夫人李嘉氏居懷慎密。秉性安貞。

皇考世祖章皇帝曩在幼冲簡爾乳抱審寒燠之節居處惟宜調飲食之和護視彌謹身居禁地名不聞於外庭日侍公宮心幾忘乎家事爾之勞勩歿猶存焉昨者躬謁

陵園爾子籲請追惟曩昔逾切軫懷爰特錫以嘉名復兼頒之饋奠嗚呼筭珎有耀典恒渥以賜劬牢醴維馨恩倍隆於念往靈兮不昧尚克歆承

順善夫人王氏

世宗憲皇帝之保母也雍正元年

諭祭四次立碑其墓碑文曰朕惟古者慎選諸母必溫良慈裕之皆全朝廷追錄舊勞貴存歿始終之罔替厥有辛勤著績夙夜殫心者必申錫以揚芬爰追褒而酬勩爾王氏職司鞠育性實恭和節宣飲食之宜維持備至審視燠寒之候調護多方朕篤念前功特加優卹犧樽致奠屢循舊典以施恩馬鬣加封用樹豐碑而表德於戲殫乳抱於生前竭誠無怠享榮華於身後食報宜長嘉名勒金石而昭垂渥澤潤泉壚而永煥承茲寵綍不亦休哉

恭勤夫人謝氏亦

世宗憲皇帝保母雍正元年

諭祭四次立碑其墓碑文曰朕惟宮庭阿保之司必資  
慈惠溫良之選用以愛護寢興追隨左右恪誠著於  
生前寵錫隆於身後凡以錄舊績賁新恩也爾謝氏  
秉性柔嘉持躬謹厚服勤內職奉朕冲年順陰陽之  
宜善調服御審寒暑之節克慎起居惟祇奉於在公  
罔經營於家事令儀如昨慨歲月之潛移勞勩堪懷  
篤始終而崇報畀良人以世職澤沛家門錫象服以  
追封榮施泉壤培佳城而孔固表素碣以增輝嗚呼  
殫心力於禁闈式昭姆範薦苾芬於筵几懋示褒綸  
用篤不忘永垂奕世

以上誕生

聖后保育

聖躬諸夫人





